



An Official Organ of YMA, Khuangpuilam Branch.

YMA MOTTO
Hunawl hman that
Zofate hmasawna ngaihtuah
Kristian nundan tha ngaihsan

Khawchin : Source - Accuweather.com

Ruah a sur rin a ni.
Temp - Max: 27°C Min: 22°C
Dar 4:57-ah ni a chhuak ang a,
Tlai Dar 5:46-ah a tla leh ang.

Tunkar chang vawn : I Joh.2:6
“Amahah ka awm reng, titu chu
Krista nun angin a nung ve tûr a
ni,’ tih hi “

TUALCHHUNG CHANCHIN

☛ Pu Lalhruaia Hrahsel, Khuangchera Section a mi chu ni 21 Aug, 2020 khan thisen unit 2 pek a ni. Damna tha tak chang turin Pathian malsawmna a dawn kan duhsak e.

☛ Pu Tlanglawmthanga, Chawng-bawla section, Cancer Hospital, Zemabawk aţangin Zirtawpni khan arawn haw thla hrih a. Chemo vawi 30 lak turah vawi 18 la tawhin, kar leh lamah chhunzawm leh an tum a ni. Damna chang zel turin duhsakna kan hlan e.

☛ Pi Lalnunziri Ngente, Chawng-bawla section, pawh BP sang luhai avanga Nazareth Hospital-a awm chu ni 21 Aug, 2020 (Zirtawpni) khan dam takin arawn chhuak leh tawh a ni. Pathian tihdamna leh awmpuina chang zel turin duhsakna kan hlan e.

**District Magistrate
thuchhuah**

District Magistrate, Kolasib District Office Order No. J. 15018/1/2020-DC(K) date 04.08.2020-a tihchhuah, National Highway-306, Kolasib to Aizawl (via Sairang road) inkar kawng hmun thenkhat siam that avanga lirthei tlan hunbi tihdang -lam chu he Order hian thlak a ni.

RTP Farm, Sethawn bula kawng siam mek kal hunbi siam chu engtiklai pawh a kal phal a ni ta a. Amaherawhchu, Superintendent of Police, Kolasib kaihhruaina hnuaiah Police duty-ten kawng siam lai tibuai lo thei tur ang berin lirthei tlan dan tur an ruahman thin ang.

Buichali leh Khamrang inkar erawh a hnuaia mi ang hian la kalpui chhunzawm tur a ni.

Sl.	Vehicle	Kawng	Khar hun
1	All	Buichali to Khamrang	6:30 (AM - PM)
2	All	Khamrang to Buichali	5:30 (AM - PM)

**VC inthlan 2020 chungchangah
R.O in thuchhuah siam**

Khuangpuilam the 23rd August, 2020 : R.O. Pu GS Zaithantluanga'n VC inthlan 2020 neih tur chungchanga vengchhung mipuite hriattur hetiang hian thuchhuah a siam a ni.

Kan hma lawk 27.08.2020 (Ningani) hian Village Council inthlanna neih a ni dawn a. He inthlanna ah hian mipuite vote thlak theuh turin kan insawm a. Chutih rualin mipui lam aţanga kan hriattur leh kan zawm ngei tur han tarlang ila.

Inthlanna hmun tur : BNRGSK HALL

Booth awm zat : 1

Candidate chungchang: Khuangpuilam Village Council-ah hian member panga(5), General pali(4) leh Reserved pakhat(1) an awm a ni.

Ballot paper chungchang : Ballot Paper hi rawng chi hnih(2) a Var(white) leh a sendang(pink) a siam a ni.

a) **A var (white)** : A var hi General Candidate te hming chauh chuanna tur a ni. Tin, ballot paper-ah hian National Parties aţanga hming ziah tan a ni ang. (entirnan : Congress Party candidate te hming ziah hmasak phawt a ni anga, MNF in a chhun zawm ang.)

b) **A sendang (pink)** : A sendang hi Reserved (hmeichhia) Candidate te chauh hming chuanna a ni ang.

Vote thlak dan tur : Kan sawi tawh angin Ballot Paper hi chihnih a awm a, a var zawkah hian Candidate hming sawm(13) a awm anga, chuta ţang chuan kan duh duh pali(4) thlanchhuah tur a ni.

A sendang (pink)-ah hian hmeichhe hming pali(4) a awm ve thung anga; chuta ţang chuan pakhat(1) thlan chhuah leh mai tur a ni.

Sl.	Hming	Nu/Pa/Nupui/Pasal	Party	Symbol
1	J.T. Kunga	Lalte (L)	INC	Kutphah
2	R. Lalmachhuana	Lianzuala (L)	INC	Kutphah
3	H. Lalroliana	Thanglianvunga	INC	Kutphah
4	Robert V.L. Hruaia	H.L. Bela	INC	Kutphah
5	Hauchhunga	Rengpitlingi	MNF	Arsi
6	F. Lalbiakliana	F. Lianhranga (L)	MNF	Arsi
7	Vanlalrova	R. Liankhuma	MNF	Arsi
8	R. Vanlalvuana	Chhuahdala (L)	MNF	Arsi
9	R.L. Lalfakmawia	R.L. Lalmangaiha (L)	ZPM	Khumbeu
10	V.L. Ngaihdama Chhangte	Rualkhuma (L)	ZPM	Khumbeu
11	Ngulsavunga	Hrawnga (L)	ZPM	Khumbeu
12	Vanlalruata Ralte	Lalthansiam (L)	ZPM	Khumbeu
13	Lalpekkima	Thuamkunga (L)	Ind.	Chem
Reserved				
14	Lalremruati	V.L. Lawmthanga	INC	Kutphah
15	Mankungi	R. Thanbanglova	MNF	Arsi
16	Romuanpuui	Vanlalchhunga	ZPM	Khumbeu
17	Lalmuanpuui	Malsawmkima	Ind.	Emping

Vote thlak ni a hriattur thenkhatte :

1. Village Council Roll a mahni Serial Number theuh lo hriat lawk tur a ni. (Vengchhung whatsapp group ah Electoral Roll hi tlangzarh a ni a, hei hi hmanţangkaiin, Inthlan niah hmunkhata awmkhawm a mahni Serial No. zawn vak vak kha a rem dawn lova, vote thlak tur te chuan mahni serial number hi lo chhinchhiah fel vek tur a ni)

(Phek 2-naah chhunzawmna)

Editorial Board :
Represent: Pu Rotlingpuia
Editor: Pu Ricky MS Dawngzela
Jt. Editor : Pu Lalsiamkima
Treasurer: Nl. Florence Zoremsangi
Cir.Manager: Tv. Samuel Lalpekhlua
Contact No: 9862501858 / 9612691291
9612761781 / 7005494983

FLS Station - 9612566886
Chawngbawla Section
Leader : Pu F. Lalbiaksanga
96121 55162
Secretary : Tv. R. Lalnuntluanga
82599 60032
Vanapa Section
Leader : Pu Lalchualova
87300 99599
Secretary : Tv. Lallawmzuala
87875 41803
Khuangchera Section
Leader : Pu Lalramzaua
76408 95924
Secretary : Pu Zachungnunga Hrahse
76299 69989

Editorial.....
Campaign leh titinaa sawrkar lai ngei hi an tha! tih hi thil awm tak a nih rualin thil atthlak tak a ni. Engati maw? Eng pawh sawrkar se, a tihtur chu ram tihhmasawn a ni. Sawrkar te ber chu Village Council hi a ni a, State sawrkar hnuaia awm, hmasawnna hna thawk tak taktu te an ni. State sawrkar hian hmasawnna hna anni atang hian an thawk a ni. Chuvangin, eng VC pawh lo nei ila, sawrkar hmanrua tur an ni a, sawrkar lai VC an ni emaw ni lo emaw, a VC-te chak leh chak loh, an fin leh fin loh, hmangchang an hriat leh hriat loh, hnathawh tur an um peih leh peih lohah a inngat zawk a ni.
Democratic Republic ram kan nih angin mipuiin kan aiawh roreltu kan thlang thin. A thlan kawngah kan fimkhur a ngai hle a ni. Mi tha hi party khatah an awm khawm vek bik loh angin, kan inthlan reng renga kan hriat tur chu rorel lai VC/MLA neih ngawt hi a ni lo tih kan hriat ve tel a ngai.
*Mizoramin sawrkarah a bikin Congress leh MNF sawrkar lo en chhin ta ila. Sawrkarna an chan kha an lawmpuiawm rualin, an tana tha lo chu hnehna an chan hian duh aiin an inhneh mah mah thin. Sawrkar chak awm tur chuan **Opposition** tha an awm a ngai. Hei hi kan chhut thiam lo thin. Opposition-te hi hmelma ni lovin min khalh kaltute an ni tih kan hriat a hun tawh.*
Chuvangin, party pakhat chaktir tum luat hi kan khawtlang tan thil tha ber a ni lo. In bei tawh leh inlungual thei tur kan thlan a ngai.

Branch YMA Office Bearer		
President Pu HD Daniala 9863212083	Secretary Pu Lalremsiama Varte 9862327112	Treasurer Pu David lalrosanga 9436158962
Vice President Pu S. Lalthangliana 8787326114	Assistant Secretary Nl. Florence Zoremsangi 9612761781	Financial Secretary Pu Rotlingpuia 9862385193

(Headline zawmna)
2. Mask/Hmaikawr vuah leh Social Distance ngaihpawimawh ngei ngei tur a ni.
3. Kut silna siam a ni a, Vote thlak tur apiang ten uluk takin kut sil hmasak vek tur a ni ang.
4. Voter ID, etc, ken theih hram nise.
5. Vote thlak tur reng rengin a hma lamin thlak vek tur a ni anga, tlai lama inngahkhawm awmlo turin inpuahchah tum hram tur a ni. Vote thlak hun chhung hi zing dar 7:00 atanga tlai dar 5:00 a ni ang.
6. Ballot Paper hi polling station kawtah Dummy (a lem/enchhina tur) tarchhuah a ni ang.
Tin, vote thlakna hmun atanga metre 100 bial chhungah campaign khap tlat a ni a. Tu party mahin bawhchhiat loh tur a ni.

Lakluh khapna thupek
Mizorama vawk pul hri a lo luh loh nan Mizoramah vawk leh vawksa atanga thilsiam lakluh khapna thupek chu ni 19 Aug, 2020 khan sawrkarin a chhuah a. He thuchhuak, Chief Secretary-in Chairman, State Executive Committee, State Disaster Management Authority a nihna anga a chhuah ah hian thu leh awm hma chuan Myanmar leh ram dang bakah state thenawm atangin vawk, vawksa leh vawksa atanga thil siam (pigs, pork and other pig products) reng reng lak luh khap a ni. He thupek ah hian AH & Vety Department chu vawk vulhna hmunhma te tihthianghlim dan te, he natna vei ni a rin vawk te chu khunghrang/dahhrang dan te leh vawk thi te chu tha taka phum a ni em tih enzui/vil tura tih an ni.
Intensive Surveillance chungchang hre duh tan leh tum khata vawk thi leh sanghal thi an tam a, an thihchhan a rinhlelhawm chuan Department Helpline no 0389-2336441/ 9436142908/9436151203 / 8794206212 ah te hriattir turin mipuite an ngen a ni.

CYMA hmalakna
No. CYMA 74/2019-2020/17 of 21.8.2020
Central Young Mizo Association
Mizoram : Aizawl
CENTRAL YMA THU CHHUAK
Hripui (Covid-19)-in Mizoram min chenchilh mek laiin, mipuite himna tura Sawrkar Department hrang hrangte leh Local/Village Level Task Force-te hmalakna avangin, Central YMA chuan lawmawm a ti hle a ni. Kan nitin mamawh puhru tura thawktu zawng zawngte chungah thinlung takin lawmthu kan sawi e.
Hripui laka kan himna tura tawrh pawh huam a, Zoram mipuite'n sawrkar hmalakna tha taka kan jawiawm laiin, Assam Rifles 46 Batallion, mi sawmpanga ten August 18, 2020 (Thawhlehi) tlaidar 3:30-a sawrkar ruahmanna dodal a, dan an bawhchhia hi kan dem tak zet a ni.
Sawrkar dan dinglai anga Mizoram chhunga lut tur ten Rapid Antigen Test (RAT) ti ngei tura Police leh sawrkar aiawh ten an ngenna pawisa lova, 46 Assam Rifles mi sawmpanga ten endikna paltlang lo a, an lirthei MN-07C-4127 hmanga Mizoram an rawn lut lui hi Mizo mipuite leh Sawrkar zah lohna lian tak ni-ah kan ngai.
Ruahman lawk ni anga lang thei, Assam Rifles Captain pakhat leh a hote, mi sawmhni panga laiin motor pathum (NL-11-2828; MZ-01-8988 leh Hyundai car dum registered loh) hmanga lo hmuaka, Vairengte Police Duty-te ralthuam nena rikrapa, dan pawisa lova Gate paltlang lui tura an ruahmanna siam hi dan zahlohna lian tak niin, vanduaithlak kan ti hle a ni.
India rama State ralmuang bera Assam Rifles-te chet dan hi Mizo mipuite hmuhsitna leh thamlohnaah kan ngai a, Dan bawhchhetute hi an phu tawh hremna an hmuh ngei theih nana hma la thuai turin kan phut tlat a ni.
Prof. Lalnuntluanga
General Secretary,
Central YMA.

Chibai, Dr. Rajendra Bharud ka nia, Samode thingtlang khua, Sakri Taluka a cheng, Bhil hnam, tribal ka ni. Ka pa hian ka pian hmaa min boralsan avangin kan chungkuaah chuan mipa an awm lo a tih theih ang chu. Kan rethei em em mai a. Thlakna tur tak ngial pawh pawisa kan neih loh avangin vawiin thleng hian ka pa hmel awm-ang pawh hi ka la suangtuah thiam lo.

In leh lo kan nei lova. Fu hnah hmanga sak bukte ah kan cheng thin. Mahse ka nu hi nu paukhauh tak mai a ni a, kan dinhmun avang hian a lungawiloh emaw, a lungngaih emaw a lantir ngai lo. Fapa pahni a neih te min enkawl turin a theihtawp a chhuah tawp mai a ni ber e.

Ka nu hian pangpar atanga zu siamin a hralh thin a. Pa ho hi zu in turin kan inte ah chuan an lokal thin. Tun hnua min hrilh dan chuan ka sen deuh laia ka tlei loh viau chang chuan chu'ng paho zu in ang chu ka kaah thlawrin min muthilh tir thin a lo ni a. A chhan chu a eizawna a lun vanglai taka amah dawrtute tihbuai a duh loh vang a ni awm e. Ka lo len ve deuh hnu chuan ka nu dawrtute 'sehhmeh' lei tura tirhkah atan ka tang ta nghe nghe a ni.

Ka nu hi mitumruh tak a nih avangin kan unau chu sikul min kai tir ngei ngei a tum tlat a. Kei chu Zilla Parishad school ah ka kala, pawisa kan neih loh avangin pen leh lehkhahu engmah ka nei lova, mahse lehkhazir chu nuam ka ti em em thin. Kan hnam leh kan khua atanga naupang sikul kal hmasaber kan nia, tuman zirna an dah pawimawh ngai lo.

Tumkhat chu kan exam laia lehkhah ka zir laiin ka nu dawrtu pakhat hian sehhmeh lei tura min tirh chu ka hnial a. Min nuih sawh zet hian 'Doctor emaw, Engineer emaw ni thei tur ang zia zang a' a ti a. Ka rilru a na khawp mai. Mahse ka nu chuan ka ni dawn a ni tiin a lo chhang a. Chu ka nu min rintawka chuan tumna leh tumruhna min siamin ka zirnaah chuan ka theihtawp chhuah turin rilru ka siam sauh sauh ta a ni.

Hun a lokal a, CBSE hnuaia sikul dang, kan khua atanga mel 150 zeta hla, Akkalkuva taluka ah admission ka hmu a. Zir zawm tur chuan chu khuaa ka awm chu a ngai a. Ka nuin min va thlah a, a hawn leh dawn chuan kan tap dun nasa hle.

Mahnia awm chu a hrehawm duh khawp mai. Mahse he hun hi dawngdah takin ka hman tur a ni lo tih ka hrechhuak thuai a. Chu chuan tha taka zirchhuak tura tumruhna min pek belh a, nasa taka zirin pawl sawmpahni (Class 12) ah chuan 97% ka hmu phak hial a ni.

Mumbai ah G S Medical college ah keima thiamna (merit) avangin seat ka hmu a, scholarship chi hrang hrang ka dawng bawka. Chu chuan ka zirna leh ka hostel awmna a tum thei vek a, ka nu chuan ka pocket money tur min rawn thawn ve zeuh zeuh thin. Zu zawrh chu kan eizawna neih chhun anih avangin ka nu chuan a chhonzawm zel a.

Ka inzir chhoh zel lai hian UPSC exam ve turin rilru ka siam a. Tichuan, MBBS final year ka zir lai chuan exam pahni hmachhawn turin ka inbuatsai a, hetih lai hian internship ka ti mek bawka. Ka nu erawh chuan daktawr ka zir tih bak engmah a hrethiam phak lo. UPSC hi eng nge, engvangin nge an exam tih emaw, eng nge a tangkaina? tih te chu a khawvel pawn lam daih thil a ni tlat. Collector (DC kan tih ang hi a ni deuh ber) nih ka duh laiin a ni chuan tehsildar pawh a hrethiam si lova.

A tawp a tawpah, kum a lo tawp meuh chuan MBBS leh UPSC result hum kawp chungin kan khuaah ka hawng ta anih chu. Kan khaw tetakte ah chuan mipawimawh engemawzat - politics lama hotute, district collector leh kan

khaw enkawltute - min lo lawm leh min lawmpui turin an lokal a. Ka nu chuan eng nge thil awmzia a hriat loh avangin eng he hu ah mah a ngai chuang lo. Daktawr ka nih thu ka hrilh a, a lawm em a. Mahse Collector ka nih tak avanga daktawr hna chu ka thawh loh tur thu ka hrilh chuan hrethiam chiah lo mahse thil ropui tak a nih chu a ring thiam ve mai a. A nihna takah chuan kan khaw mi tumahin eng nge a awmzia an hrethiam lo. An zavai chuan 'an Raju' kha milian tak a ni tawh tih zawng an hria a, a then phei chuan conductor ka nih avangin min lawmpui ang nawk nawk bawka!

Tunah chuan Nandurbar district ah District Collector hna thawkin ka nu pawh ka bulah a awm a. Ka awmna district hi an la hnufualin adivasi leh tribal tamna ani bawka nen hnathawh tur a tam khawp mai. Hma an sawn theihna atana tul leh mamawh siam sak ngei hi ka chak tawh khawp mai.

Harsatna tamtak paltlanga he dinhmun ka thlen dan hi zawhna ka dawng nasa thin khawp mai. Naupan tet lai atangin harsatna ka hmachhawn a. Nikhata chaw vawihni eitur neih ringawt pawh hi kan tan chuan sual tham fe a ni. Kan infiamna neih ve chu theihai mu leh hmawh a ni mai a. Tui chen leh tlang lawn te chu kan naupan lai hun kan hman dan a ni a. Hei hian rilru leh taksa min ti paukhauh em em thung a ni. Tunge ka kiangah awm? Ka chakna - Ka Nu, leh kan thenawm khawveng, keimahni ang bawka retheite. Keini ang bawkin an ril a tamin keini ang bawkin an infiam a, retheihna awmzia hian min khawih ngai lem lo.

Mumbai a lehkhazira kan awm hnu zet chuan danglamna chu namenlo tak a lo ni si. Mahse hausa te kha ka awt ngai lovin kan retheihnaah khan puhmawh tur ka zawng ngai lo. Ka hriat chhuah erawh chu, ka dinhmun leh nihphung tidanglam tur hian keiman ka thawh a ngai tih hi a ni.

Tichuan, lehkhah ka zir a, exer ka la a, lehkhah ka zir leh thin. Ni e, naupang leh tleirawl pangngaiin an neih thin ang tamtak kha ka nei ngai lo. Mahse tuna ka thil neih te hi kei chuan thlir ka thlang zawk asin. "Bhil tribal mipa naupang, Rajendra Bharud, kum 31 a IAS ni thei, kan hnam leh kan veng a hmasaber ka ni. Tunah chuan ka duhthusam thin ang zawng zawng ka nei thei ta.

Pawimawh ta ber chu, thingtlang khaw tetakte atanga tun dinhmun ka thleng thei tih an hmuh hian kan khua a miten eng nge an thlen thei tih an hriat phah a. Hei ringawt pawh hi lawmman ropui tak a ni.

Kan fate chung rinna kan nghan dan azir hian an tumruhna leh an puitlinna kawngah nu leh pate hian mawh kan phur nasa hle tih a lang Chiang em em bawka. Kan thawhrima, taima taka kan tih tur kan hlen chuan vanneihna in min hmuak ngei ngei thin. Mi hlawhtling ni tur chuan vawi engemawzat hlawhchham chang a awm ngei ngei thin, Chungte avanga beidawng lova bei hram hram thin chuan hlawhtlinna an chang ngei ngei thin. Kan retheihnate hi inrahbeh tir mai lovin, kan tum ti hlawhtling tura huaissen leh chakna min petu PATHIAN i bel reng thin bawka ang u.

Interview tu: Madhuri Pethkar

I thil ngaihtuah kha ngaihtuah nawn leh la, a sir dang atangin thlir tel thin bawka ang che.

COVID-19 “vaccine update
INDIA IN COVID-19 VACCINE PHASE 3,
MIHRINGAH A ENCHHIN TA -

India chuan coronavirus invenna vaccine a siam chu mihring laka enchhin thawh thumna (Phase 3 human trials of COVID-19) a nei ta tih NITI Aayog thu chhuah chuan a sawi.

Hetianga vaccine peih hnai anih tak avang hian Central Sorkar chuan vaccine siamtu company te chu an vaccine man ni thei awm a zawt tawh tih, NITI Aayog member V.K. Paul chuan a sawi .

Hetih lai hian, Chinese vaccine Sinopharm company siam pawh December 2020 ah chuan hman theihin an peih fel hman ang. A man hi vawi hnih chiu Rs 10,000 a nih tur thu Chinese Communist Party Chanchinbu Global Times report chuan a tar lang.

Australia Prime Minister chuan COVID19 vaccine siam peih anih chuan an ram mipui zawng zawng tan a thlawna pek vek an nih tur thu a sawi thung. Sorkar laipui hian he ruahmanna ang hi kalpui thei tak maw?

NITI Aayog member V.K. Paul chuan India ram chhungah COVID-19 vaccine hi siam mek company 3 an awm a, an thlen thui chin a inang lo vek a, “ vaccine pakhat chu mihring chungah enchhinna (phase-3 trials) tih mek a ni a, a dang pahnihte pawhin hma an sawn tha hle a, tunah hian phase 1-2 clinical trials an ti mek a ni. Amaherawhchu, VK Paul hian COVID19 vaccine siamtu company leh an nihna te erawh a sawi lang lem lo thung.

Central Sorkar chuan heng coronavirus vaccine siamtute dinhmun chipchiar tak leh an thlen chin chu a en thli thlai reng a, vaccines siamtute hmasawna pawh a tha hle a ni, tih thu a sawi. Vaccine siam zawha hman theih anih hunah rang taka sem chhuah dan tur ruahmanna pawh peih fel vek a nih tawh thu a sawi.

COVID19 vaccine price Central Sorkar chuan coronavirus vaccine siamtu company te nen vaccine man chungchang hi an sawiho tawh a, Sorkar chuan vaccine man tur awm zat vel hi Company hnehah bithliah thuai turin an ngen tawh a ni.

India ram chhungah hian ram dang thiamna tel lo, India tual chhung kut chhuak vaccines siamtu pahni an awm a, chung te chu mihring hnena enchhin mek a ni. Chung te chu COVAXIN leh ZyCoV-D te an ni. Covaxin hi Bharat Biotech, Indian Council of Medical Research (ICMR), leh National Institute of Virology, Pune tang khawm ten an siam a ni. COVAXIN hian mihring hnena enchhin thawh khatna thla khat chhungin a paltlang tawh a, mihring chungah enchhin thawh hnihna (Phase 2 human trials) pawh tih zawh a ni leh tawh baw. Mihring hnena COVAXIN enchhinna hi India ram hmun thlan chhuah bik (medical college) 12 an kalpui a ni. Vaccine dang leh chu Zydus Cadila -- Ahmedabad te siam mek ZyCoV-D a ni thung.

Hetianga anih mek lai hian Pune- khawpuia awm hmun khuar Serum Institute of India pawhin mihringah enchhin thawh thumna (phase 3 human trials) chu an ti zo tawh a, an ni hi Oxford-AstraZeneca’s nen thawkho an ni.

Tunah hian Khawvel pumah COVID-19 vaccine peih hnai zual candidate 8 an awm a, hengho hian mihring chungah enchhin (phase 3 trials) an hma chhawn mek hlawn a ni. Chung te chu :1. Oxford-Astra Zeneca, 2. Moderna, 3. Pfizer-BioNtech, 4. Beijing Institute of Biological Products Sinopharm. 5. Wuhan Institute of Biological Products-Sinopharm, 6. Sinovac, 7.Cansino, 8. Russia’s Sputnik-V. Hetianga anih mek lai hian Russia siam Sputnik-V chu conditional registration tih tawh a ni a, China siam Cansino a thiamna thuruk vawn that (patent) a ni tawh a, sipai tan hman theih tura pawm a ni tawh baw.

University of Oxford leh AstraZenca Plc, te COVID-19 vaccine siam hi hi phase 3 trial India ram Medical College thlan chhuah 17 ah kalpui mek a ni baw. A hlawn lian thama siam chhuah theih anih hunah Serum Institute of India in a siam chhuak ang. SERUM hi khawvel puma vaccine siamtu lian ber a ni.

Bill & Melinda Gates foundation ruahmannain Serum Institute of India hian vaccine mi pakhat chiu (one dose) chu Rs. 240/- manin a siam chhuak ang. He inremna ang hian COVID-19 vaccine hi 100 million dose a siam chhuak ang a, ram rethei a sem tur a ni ang, heng zinga 50% hi India ram state/district rethei zual te chan tur a ni phak hial ang. Bloomberg chuan COVID-19 vaccine tha ber India siam Khawvelin a beisei hle tih a ziaak ve mek baw a ni.

Prime Minister Narendra Modi chuan Independence day thu chah a sawiah ram chhungah COVID-19 vaccine mihring tana him tualchhung scientist ten an bei mek a, mipui tan hman theih anih vele rang taka sem dan tur pawh ruahman sa vek a nih tawh thu a sawi baw.

FIMKHUR NAN AW

Tun laiah WhatsApp leh FB kan khawih nasa tawh hlawn si a, ho te emaw tih ah thu buai nei a thiam loh chan mai theih a nih vangin thil post tur leh post loh tur kan hriat theih nan heng te hi hriat reng a ?ha awm e.

1. Saruak leh Ruang thlalak thawh darh. Hremna: Kum 3 thlang jail or/and Rs. Nuai 5 thlang chawitir.“IT Act Sec 66A.

2. A neitu phalna lova mobile/computer khawih IT Act Sec 43. Hremna: Kum 3 thlang jail or/and Rs. Nuai 3 thlang chawitir.“IT Act Sec 66.

3. Social Media-a Fake account. Hremna: Kum 3 jail or/and Rs. Nuai 1 thlang chawitir “IT Act Sec 66C.

4. Dan-in thiam loh a chantir ni lo, mi 'A eiru',etc. tia Social Media-a comment. Hremna: Kum 2 thlang jail tan or/and Pawisa chawitir.“IPC Sec 499.

5. Social Media-a sakhaw dang deusawh leh sawichhiat. Hremna: Kum 3 thlang jail tan or/and pawisa chawitir.“IPC Sec 153A.

6. Zahmawh rawngkai leh invauna (tualthah, pawngsual) kaihnawih thawh darh. Hremna: Kum 7 thlang jail tan & pawisa chawi.“IPC Sec 506, 507.

ICT Department, Govt. of Mizoram.

THALAI TE TANA CHENFAKAWM

Mizo thalai te tan Skill Development Training buatsaih ani dawn e. Training na ah hian practical work thiam ngei tura in zirtir leh thawk nghal thei tuin, in tan hmachhawp tha tak kanlo buatsaih e. Mi tu tan pawh dil theih ani a, khawpui lama chenna in tur neilo tan pawh awmna tur leh ei in turn nen lam kanlo ngaihtuahpui dawn che u a nia.

Construction work te hi thiam tak leh tha thei ang bera, Technical thil zawng zawn nen lama I tana tangkai tur zirtir tur che in Architect, Engineer, Designer, Mistiri, etc., te hnuaiah rawn in zir ve tache. Training chhung zawng hian thlatin Stipend Rs. 7,000.00 a dawn theih cheu baw e.

Building Construction work kaihnawih reng reng, heng a hnuaia tarlan ah te hian thiamna rawn nei ve rawh le: 1). Cement work,2). Carpentry work, 3). Plumbing work, 4). Electrification, 5). Board work, 6). Paintings 7). Site Management etc.,

Tunlai hrileng vel vang in walkin interview hi neih rihloh tur ani a, heng contact number kan rawn tarlan ah hian ngaihven dutan a ngaihven theih ang. 9366850538 / 7085417893 .